

UTSCHELS

Nov schef dal biro per la protecziun d'utschels en il Grischun

L'inschigner da l'ambient *Tom Bischof* è il nov schef da BirdLife Grischun. En cooperaziun cun organisaziuns da partenari s'engascha el per il mantegniment d'utschels e lur abitudis en il Grischun. Il ornitolog s'engascha per mantegnair il mund d'utschels oraifer multifar da las valladas grischunas. Bia spezia che n'existan betg pli en la Bassa èn aunc presentas qua e valan da vegnir protegidas. BirdLife Grischun posseda en tut quatter secziuns e var 700 commembers. En spezial duess vegnir scolà dapli interessents per pudair prestar l'impurtanta lavur da proteger la natira. (cdm/fmr)



Il passionà ornitolog Tom Bischof ed niev schef da BirdLife Grischun.

FOTO MAD

PRO NATURA GRISCHUN



Semadeni presidescha uss la Pro Natura Grischun. FOTO OLIVIA AEBLI-ITEM

Silva Semadeni è nova presidenta

Silva Semadeni è la nova presidenta da Pro Natura Grischun. L'antieriura cussegliera naziunala è stada 22 onns en suprastanza da Pro Natura Svizra – da quai 16 onns sco presidenta. *Silva Semadeni* è vegnida elegida unanimamain a chaschun da la davosa radunanza da commembras e commembers. Ella haja marcà fermamain la collavuraziun cun las secziuns e la diversità linguistica e culturala da la Pro Natura. Semadeni intimescha: «Ina protecziun consequenta da la natira, da la cuntrada e dal clima è pli che mai necessaria, era en il Grischun.»

Plinavant ha la radunanza era elegì *Andrea Bachofen* sco nova commembra da suprastanza. La studenta da giurisprudenza da 21 onns surpiglia l'uffizi da cassiera. (rtr/fmr)

LA CIFRA DAL DI

275

maschinas da pista preparan las pistas dal Grischun. Tenor il rapport annual da Pencilaras Grischun èn 56% da talas maschinas equipadas cun in filter da partclas.

Voss «orizonts»

La gasetta *La Quotidiana* por-scha ina pagina cun il titel «Orizonts», la quala dat spazi a contribuiziuns era da lecturas e lecturs. Sin ils «Orizonts» duain avair piazza brevs, opiniuns, artitgels da forum, necrologs, fotografias commentadas, gra-tulaziuns etc.

Las contribuiziuns ston esser signadas cun num da l'autur u da l'autura. I vegnan publicadas mo contribuiziuns scrites en lingua rumantscha

Vossas contribuiziuns pudais trametter a la redacziun FMR: redacziun@fmr.ch ubain per posta FMR, Fundaziun Medias Rumantschas, Via da Masans 2, 7000 Cuira.

LA QUOTIDIANA

Editura: Somedia Press AG
 Editur: Hanspeter Lebrument
 CEO: Thomas Kundert

Editura Somedia
 Via Sommerau 32, 7007 Cuira;
 tel. 081 255 50 50,
 mail: verlag@somedia.ch

Redacziun responsabla:
 Fundaziun Medias Rumantschas (FMR):
 Schefredactor FMR: David Truttmann (dat)
 Substituts schefredactor FMR:
 Hans Huonder (hh), Sandro Buchli (sb)
 Redacziun FMR:
 Augustin Beeli (abc), Andreas Cadonau (ac),
 Daniela Derungs (dd), Flurin Andry (fa, correctorat),
 Gabriela Desax (gd, correctorat),
 Madlaina Capeder (mc, correctorat),
 Annatina Filii (afi), Nadja Lucchinetti (nl),
 Susi Rothmund (sr), Andri Netzer (an),
 Sandra Balzer (sab), Martin Gabriel (mg),
 Tanja Jäger (tj), Lisa Peers Dermont (lpd),
 Martin Camichel (mac).

Adressas redacziunals:
 FMR Fundaziun Medias Rumantschas,
 Via da Masans 2, 7000 Cuira, 081 544 89 10
 mail: redacziun@fmr.ch
 secretariat: 081 544 89 11

www.fmr.ch

Servetsch d'abunents e da distribuziun:
 Via Sommerau 32, 7007 Cuira,
 tel. 0844 226 226,
 mail: abo@somedia.ch

Inserats:
 Somedia Promotion,
 Städtlistrasse 12, 7130 Glion
 tel. 081 920 07 17, fax 081 920 07 18,
 mail: ilanz.inserate@somedia.ch

La Quotidiana cumpara tschintg giadas ad emna
 Ediziun derasada, Südostschweiz komplet:
 66 466 exemplars (WEMF, 2021)
 Derasaziun: 115 803 lecturas e lecturs
 (MACH-Basic 2021-1)

La Somedia Press AG è possessura dals titels
 «Fögl Ladin», «Gasetta Romontscha», «Casa
 Paterna/La Pünt» e «La Vouch da Surmeir».

Pretschs d'abunaments sut:
 www.suedostschweiz.ch/aboservice

Communicaziun da participaziuns considerablas
 sin fundament da art. 322 CP:

nagin

© Somedia

ZULPRINS

Da la spessaglia da giavüschs, utopias e clomadas


JANIC MASKOS

Giavüschs sun sco las astras i'l vasch sün maisa. I dschermuoglian d'ün sem sech ad üna flur chi stragliüscha da di, sco las stailas da not. Per tscherts sun giavüschs noss battasendas i'l mumaint. I'ns guidan, apunta sco stailas, tras nosssa vita, ans regalond buna spranza per l'avegnir. Invezza cha per oters sun giavüschs gods spess, cun bos-cha chi's stend'in ot, travuondond tuot e minchün in lur verd brünin. Lur ragischs as chavan tras terr'e crappa, liond nufs chi pon gnir schliats be dals mans da quel chi desiderescha o dit oter: da quel chi giavüscha.

Eu chamin in crusch ed in traviers tras ün tal god, pensond a meis avegnir. Am fond massa blers giavüschs, tscherts be dastrusch, sco per exaimpel d'avair la libertà e l'abilità dad ir sulet cun l'auto, ed oters lontans chi's rechattan in ün muond incuntschaint ed in ün temp different, per exaimpel il giavüsch da gnir nomnà ün di «bap»; am stravia adüna darcheu pervi da meis interess. Els sun nempe ils sems da meis giavüschs. Els sun quels chi plan a plan lian ils nufs, chi stortiglian e dantiglian ils singuls giavüschs, fin cha ün giavüsch invoula la glüm dal prosem. Lura nu suna plü capabels da coexister. Dit cuort, cum-battant meis interess e lur giavüschs, üna clomada cunter tschella in üna guerra interna chi's palesescha illa maladestrezza chi m'assaglia minchatant.

Üna chosa ourdvard curiosa, quista guerra. Da las jadas suna las scienzas naturalas chi'm fascineschan. Co chi rivan da tradüer, a la fin eir simplifichar e redüer la bellezza cha la natür'ans preschainta di per di, in fuormlas e reglas universalas chi tendeschan sur cunfins, naziunalitats e muonds. La precisium chi's muossa illa materia, chi's chatta uschigliö be i'l muoster dals stinvs, fats cul spait da nona. Co cha tuot la diversità as basa sün las istessas partclas. Quai fascinescha.

Ed in mumaints cha tuot quai am vain per testa, am giavüscha da pudair contribuir mia part a la scienza natürala – ün di. Eu timun a mai stess chi nu detta absolutamaing nüglia plü essenzial co la



«Guarda co cha' l sulai splendura sü casü – Val Tavrü»

FOTO JANIC MASKOS

scienza natürala, ch'ella saja l'unic rom cul potenzial da m'imprometter svilup per l'umanità. Cha be ella possa parturir las soluziuns per problems dal preschaint e tantplü per sfidas chi'ns confrontaran in avegnir. Quista clomada da megldrar ün di il muond, saja quai cun ün medicamaint cunter il cancar, cun üna nouva funtana d'energia o eir cun üna nouva metoda d'agricultura, porta cun sai eir amo ün oter giavüsch. Quel da l'utschè chi banduna sia chabgia.

Il desideri da la lontananza. Da viver in ün otra cultura, da discuorrer ün'otra lingua e da verer il bön ed il mal dal muond. Dit franc – da scuvrir ils s-chazis da l'ester. Quist bösch cresch'ad ün crescher, as derasa e fa ragisch. In concorrenza as stenda ün oter giavüsch vers il sulai.

Il giavüsch d'üna vita sco in üna stüva prüvada, ingio cha tuot ha seis lö e sia lezcha. Eu giavüsch da'm sentir dachasa eir cun ir our da porta. Al mumaint daja be ün lö chi porta las pretaisas per quist giavüsch, nempe l'Engiadina. Dad ella parta il sentiment d'esser dependent da plüssas drogas i'l istess mumaint, tuottas istess fermas, ma gnanc'üna toxica. Sajan quai ils prads chi fluriskan o ils chomps sgiats, ils larschs d'or o il god cuernà cun zücher puolvra. O la lingua, la quala eu nu mangl gnanca dudir, chi bast'il tschair per sentir sia melodia.

Cur ch'eu tir meis frains, per sfrenar per ün mumaint il gir da meis muond, schi l'Engiadina prouva da m'intimar da

far güdizi ed invlidar tuot ils oters giavüschs. «Eu sun giavüsch avuonda», am scutt'la, adün'inavant.

Ed eu giavüsch cha quist sentiment d'esser dachasa, d'esser dependent, però eir cha la dumonda sur da restar o partir, possa prosperar in etern illa gliued chi viva quia.

Eu craj cha quist giavüsch deriva da meis interess per ün dun cha be nus umans vain. Nempe la capacità da crear art e cultura, da surpassar il cunfin da quai chi's percepischa e da s-chaffir novas realtats. Da regalar a roba vana ün'importanza. Perquai giavüscha da surdar mias fascinaziuns, meis plashairs, fors'eir meis savair, mia mera e mias valurs a la prosma generaziun. Nun es la carica da magister adattada per quista lezcha, per quista respunsabilità? Dimena d'vantar magister per cha l'Engiadina possa restar ün dachasa eir in avegnir. Quist giavüsch pretenda però da far ragisch. Da's domiciliar i'l cuntschaint ed ir là lura in tschercha da l'incuntschaint. Basta quai?

Quai es l'anatomia da meis god spess. Partind dals interess vasts am perda i'ls giavüschs, in fuond clomadas chi's differenzeschentan es cuntradischan talmaing. Là am saint eu sco ün asen tarter duos tocs fain. Natüralmaing daja gliued chi pretenda chi's possa seguir eir a plüs giavüschs i'l istess mumaint. Cler, cun tscherts va quai, ma ils giavüschs grondos, a quels esa da tschüffer per las

cornas, e quai cun duos mans. A reguard meis giavüschs manzunats survart, esa dad agiundscher cha nus vivain in ün muond specialisà. Per ün avegnir sainza süttinas, fominas, inuondaziuns e terratremls, però eir per ün futur culla lingua rumantscha voula gliued chi s'ha decisa per ün singul giavüsch, chi ha fixà üna staila, tschernü ün'astru d'ün vasch plain, perquai cha quella gliued sacrificess tuot, per cha lur singul giavüsch s'accomplischa.

Eu svesch nu m'ha amo decisa per ün giavüsch. Forsa ch'ün di m'as preschainta mia clomada inaspettadamaing, cun ün tschögn suord, ün scut müit, be uschè e decisa füss tuot la chosa. Intant suna amo ch'eu'm sgrat davo las uraglias e chi sa quant'aua chi passará amo giò da l'En fin cha' l god as sclerischa.



Ils «zulprins»

Ils «zulprins», uschia sa numna la rubrica per auturas ed auturs giuivens, ina rubrica che cumpara en collavuraziun da la GiuRu Giuventetgna Rumantscha cun la FMR Fundaziun Medias Rumantschas. La finamira cuminaivla da GiuRu ed FMR è da dar spazi e vusch ad auturas ed auturs giuivens. Ils «zulprins» duain damai far qua u là sbrinzlas!

Dapli infurmaziuns davart la GiuRu sin giuru.ch ubain via mail a giuru@giuru.ch.